

डुगगर दे मेले

□ सत्यपाल

कुसै नै ठीक गै आखे दा ऐ, "मेला मेलियेँ दा, पैसे धेलियेँ दा ।" मेला नां ऐ मेल दा । मनुक्खेँ दे मेल दा । रली-मिली बौह्ने दा ते दुक्ख-सुख फरोलने दा । खुशियां मनाने दा । मनुक्खी जीवन दुक्ख-सुख दी सांझ ऐ । खुशी-गमीं दा जोड़ ऐ । खुशी मनाना सुखी जीवन दा जरूरी हिस्सा ऐ । हर जाती अपने-अपने रीति-रवाज ते तौर-तरीके कन्ने खुशी मनांदी ऐ । गमीं कुसै बेल्लै बी बरती सकदी ऐ । नुहाड़ा कोई दिन-बार, थौह्-ठकाना नैई हुन्दा । खुशी मनाने आस्तै हर लाके च दिन, समां, ध्यार, पर्व ते मेले निश्चत कीते गेदे न ।

डुगगर लाके च मते सारे तेह् थाह् र न जिन्दी बड़ी मानता ऐ ते उनें थाह् रें दी यात्रा दा बड़ा म्हातम मन्नेआ जन्दा ऐ । जियां हाड़ म्हीन्ने दी पुन्नेआं उप्पर सुद्ध महादेव, जन्मअष्टमी उप्पर बासक नाग (भद्रवाह) कपलाश (भद्रवाह) मनीम्हेश (चम्बा) रक्खड़ पुन्नेआं उप्पर अमरनाथ ते बुड्ढा अमरनाथ (पुन्छ-राजौरी) ते शिवरात्री उप्पर शिवखोड़ी (रियासी) ते पीरखोह् (जम्मू) नरातेँ च वैशणो माता, सुकराला, बाह्वा, चीची माता कांगड़ा, जुआलाजी, चमुण्डा ते होर केईं थाह् र । आम कौमी दिन-ध्यारें, जियां पंदरां अगस्त, छब्बी जनवरी, दसैह् रा, दियाली, लोह्डी, शिवरात्री, जन्म-अष्टमी, गुरपर्व, ईदां आदि दे लावा डुगगर परदेसै दे किश अपने गै दिन न, जिन्दे पर मेले लगदे न ।

डुंगर परदेस च शहूर ते मते न पर जम्मू शहूर इसदा इक खास शहूर ऐ। इसदा शलैपा अपनी गै किसमा दा ऐ ते जींदी-जागदी मसाल ऐ। इसी मन्दरें आला शहूर आखदे न। डुंगर लाके च जिस बक्खी मरजी चली जाओ, मन्दर, शिवदुआले, देहरियां, थान हर पासै ल'बगन। जम्मू दा कोई बी म्हल्ला, गली, बजार नेहा नेई, जित्थें मन्दर नेई' होग। रघुनाथ मन्दर, रपें आला मन्दर, रणवीरेश्वर मन्दर, पीरखोहू, गीता मन्दर ते बाहूवा खास मन्दर न। जम्मू दे चार-चफेरै केई थाहूर न, जित्थें मन्दर जां देवी-देवतें दे स्थान न ते उत्थें मेले लगदे न। बसाखा कोला लेइयै चेततरा तगर कोई गै नेहा म्हीन्ना होग जिस च कोई मेला नेई' लगदा होग।

नराते ब'रे च दो बारी औंदे न। इक बारी अस्सू - कत्ते च ते दूई बारी चेततर-बसाखै च। लोक नराते अपने-अपने घरें च मनांदे न। नरातें दी खास रौनक ते चहल-पहल वैशणो देवी, बाहूवै, सुकराला, चीची माता, कांगड़ै, जुआलाजी, चमुण्डा ते भद्रवाहू, दे केइयें मन्दरें च दिक्खने आली हुन्दी ऐ। इयां ते लोक वैशणो माता सारा साल गै औंदे रौहूदे न, पर अस्सू-कत्तें दे नरातें च औने आलें दी गिनतरी मती बधी जन्दी ऐ।

बसाखी दा रंग :

बसाख म्हीन्ने दी संगरांदी गी नमां ब'रा शुरू होई जन्दा ऐ ते इस्सै दिन कोला मेले बी शुरू होई जन्दे न। नमां दिन, नमां ब'रा, नमां फसल ते नमां मौसम, नमियां गै गल्लां लेइए पर टकांदा ऐ। बसोआ ग्रां-ग्रां दा करसानी मेला ऐ। करसान अपनी पीली-सोनमई कनका गी दिक्खी-दिक्खी पसोंदे न ते उन्दा मन भांगड़ा मारने गी उ'ड़की-उ'ड़की पौंदा ऐ। चेततर चढ़दे गै ग्रांएं च ढोल बज्जन लगी पौंदे न ते मसां-मरिऐ बसोआ औंदा ऐ। बसाखी दे मेले दी रौनक भांगड़ा गै हुन्दा ऐ। बक्खरे-बक्खरे ग्रां दा बक्खरा-बक्खरा भांगड़ा। हर इक दी अपनी काढ ते अपनी रौस हुन्दी ऐ। बोल्लियां पाई-पाई नचदे न, पुट्टियां-सिद्धियां मारदे न। मेले च चार-चफेरै ढोलें दी गड़-गज्ज पेई दी हुन्दी ऐ। कदें कुसै गी बसाखी आले दिन जम्मू थमां पठातकोट, जम्मू थमां नमां शहूर, जम्मू थमां अखनूर जां उधमपुर जाने दा मौका थहोआ होऐ तां उसनै दिक्खेआ होग जे रस्ते च थाहूरें-थाहूरें किट्ठ होए दा हुन्दा हुन्दा ऐ। मेला लग्गे दा हुन्दा ऐ ते ढोल बज्जा दे हुन्दे न। उसनै ए बी मसूस कीता होग जे नुहाड़ा मन बी नचने गी कीता। आखदे न जे इस मेले

च इक नेहा सरूर ऐ जेहूड़ा लूलें गी बी नचाई ओड़दा ऐ।

बसाखी पर घर-घर ते ग्रां-ग्रां दा मेला ते ऐ पर किश नेहू, थाहूर बी हैन, जित्थें इस मेले दा गुहाड़ होर गै होई जन्दा ऐ। जियां देवका दे कण्ठे उधमपुर, परमण्डल, उत्तर - बहूनी, हरिमन्दर (नमन्दर) (सांवा) ते नागबनी (जम्मू)।

धमदहू :

हाड़ म्हीन्ने दी संगरांदी गी धमदहू, जां धर्म-ध्याड़ा बी आखदे न। इस दिन लोक घड़े-कुन्नियां मनसदे न। ए राडें दा ध्यार ऐ। इस्सै दिन कोला हट्ट शुरू होई जन्दे न। इस्सै दिन इक मेला ग्रां राड़ा, तसील सांवा दे कोल कपलापीर दे आसन उप्पर लगदा ऐ। कपलापीर गुरु गोरखनाथें दा चेला हा। उसदी इत्थें गद्दी ऐ ते नुहाड़ी याद मनाने आस्तै मेला लगदा ऐ। आले-दुआले दे ग्रांएं चा मते लोक किट्ठे होई जन्दे न। दूरा-दूरा बी लोक औंदे न। जिनें जातियें दा कपलापीर कुलदेव ऐ, उन्दी मेल बी लगदी ऐ। मेले दे परतें इक छि'ज बी हुन्दी ऐ। मते सारे घोल होंदे न—पहूलवानें दे दास दिक्खने आले हुन्दे न।

सिद्ध-सुआंखा :

हाड़ म्हीन्ने दे नचन्दरे तारा गी सिद्ध-सुआंखे मेला लगदा ऐ। सिद्ध-सुआंखा जम्मू थमां लगभग २२-२३ मील दूर ऐ। इत्थें बाबे सिद्ध-गोरिये दा प्राचीन थान ऐ। बाबे दी समाधी तलास दे बशकार ऐ। ए गद्दी मुन्दरें आलें बाबें दी ऐ। गद्दी दा मालक पीर खुआंदा ऐ। रौहूने आस्तै सराई बनीं दियां न। खुल्ला हात्ता ऐ। भैरों दी समाधी कन्ने किश होर समाधियां बी हैन। आखदे न जे तलास च भाएं किन्ना गै पानी भरोची जा, पर समाधी नेई' डुवदी। ओ आप-रमी गै उप्परा गी चकोई जन्दी ऐ। १८४७ कोला पहूलें ए मेला पूरे अट्ठ दिन रौहूदा हा, पर हून त्रै दिन गै रौहूदा ऐ। तार, सुआर ते पही अगला तार। सुआरें संजॉ छि'ज बी हुन्दी ऐ। बड़ी-बड़ी दूरा पहूलवान औंदे न। केई-केई ते दर्शनी पहूलवान हुन्दे न। लोक बड़े चाएं-चाएं घोल दिखदे न ते खुश होंदे न। साधुयें - जोगियें दी रौनक दिक्खने आली होंदी ऐ। कोई धूनी तपदा ऐ, कोई टोपी पींदा ऐ, कोई जटें आला ते कोई रुण्ड-मुण्ड, कोई चोगे आला ते कोई नंग-मनुंगा, कोई बैठे दा ते कोई खडुत्त। ढोल बजदे न ते जात्तर-चौकी हुन्दी ऐ। चेलें-देआले नचदे

न । बाहरें बजार लागे दे हुन्दे न । हाते दे अन्दर साधु, जोगी, चेले, देआले, ते होर मत्था टेकने आले लोक हुन्दे न । दिक्खने ते सुनने च बड़ा फर्क हुन्दा ऐ । मेला दिक्खियै गै आदमी अन्दाजा लाई सकदा ऐ जे किन्नी रोनक हुन्दी ऐ । मेले च जाइयै आदमी घर-बाहर भुल्ली गै जन्दा ऐ ते उत्थों औने गी मन नेईं आखदा । इस मेले च कक्कड़ियें, दुहानें दी भरमाली हुन्दी ऐ । कदें-कदें भरमाली दा साथ अम्ब वी देई ओड़दे न । इस मेले च डग्गर-महेरुं दी मण्डी वी लगदी ऐ ।

हाड़ म्हीन्ने दी पुन्नेआं :

हाड़ी दी फसल सांभियै करसान बिन्द-क सुखै दा साह, लैदे न । पही देवी-देवतें दे चेत लेइयै हाड़ा दी पुन्नेआं आई जन्दी ऐ । इस पुन्नेआं दी डोगरें च खास मनता ऐ । ए देवी-देवतें, कुलदेवें, सतियें, शहीदें ते शिलावैतियें दी पुन्नेआं हुन्दी ऐ । इस दिन हर जाति दी अपने देवतें दियें देहरिएं पर मेल लगदी ऐ । जित्थें-जित्थें वी देहरियां होन, उत्थें-उत्थें गै मेला-जन लग्गी जन्दा ऐ । किन्ने गै बक्करे बढोई जन्दे न । इनें मेले दे अलावा केई स्थान नेहू न, जित्थें खास मेले हुन्दे न । ओ इयां न :—

गहार :

ए प्रां कट्ठे ते रियासी दे बशकार ऐ । ए बावा जित्तो दा जन्म-स्थान ऐ । इत्थें बावा जित्तो दा थान ऐ ते ए राँसली जगह उच्चे-उच्चे प्हाड़ें कन्ने धिरी दी ऐ । वृषणो माता दे चरणें चा ठण्डा-ठार पानी उत्थें आइऐ लोकें गी ठण्डक पजांदा ऐ । इस लाके दा इत्थें बड़ा बड़डा ते शैल मेला हुन्दा ऐ । किट्ठे होए दे प्हाड़ी लोकें दी रोनक दिक्खने आली हुन्दी ऐ ।

महादेव दा चम्वा :

ए प्रां उधमपुर पैथल सिडका उप्पर ऐ । उत्थें बावा महादेव दा थान ऐ ते कन्ने गै इक देहरी ऐ, जिसदे अन्दर बैहरी दा मोहरा ऐ । पुन्नेआं आलै दिन आले-दुआले दे चले-देआले जातरां करदे इत्थें आई जन्दे न । खुल्ले चगानें च अरगा बालेआ जन्दा ऐ । चले-देआले जातरां करदे-करदे बलदी अग्गी च जाई बडदे न ते नचची-नचची अग सहाली ओड़दे न । बावा महादेव जी दी शक्ति कन्ने उनें गी सेक वी नेईं लगदा । निजम ए ऐ जे चले

ने बरत रक्खे दा होना चाही दा । मेले दी रोनक बड़ी गै शैल हुन्दी ऐ ।

मेईमल्ल दा डग्हेरा :

बावा मेईमल्ल बड़ा गै शक्ति आला बावा होआ ऐ । उसदा थान प्रां डग्हेरा (अखनूर) च ऐ । पुन्नेआं आलै दिन उत्थें मेल लगदी ऐ । इक बड़ा भारी मेला हुन्दा ऐ ते जातर हुन्दी ऐ । चले-देआले अपना रंग वान्नी दिन्दे न ।

मानसर :

मानसर इक झील होने दे कारण मशहूर ऐ । झील च बड़ियां मच्छियां-मच्छ न । इत्थें नागें दा मन्दर ऐ । ए नाग वी कुसै जाति दे कुलदेव न । इत्थें वी पुन्नेआं गी मेल लगदी ऐ । मते लोक औंदे न । 'कन्ने देवी दे दर्शन ते कन्ने ब'न्जे दा फेरा' ए गल्ल इत्थें पूरी उतरदी ऐ । कन्ने लोक झील दिक्खी जन्दे, ठण्डे फनाके लेई जन्दे ते कन्ने देवते दी पूजा करी जन्दे । इत्थों दा नजारा ते उ'आं गै बड़ा सन्हाकड़ा हुन्दा ऐ । इस लाके दे लाल-सन्दूरी रंगे दे अम्ब मेले गी अपने रंगें रंगी ओड़दे न । दूरा आये दे लोक अम्बें वी सगात लेई जन्दे न ।

सुद्र-मांह देव :

सुद्र-मांह देव इक जानी-पन्छानी जगह ऐ । डग्गर दा इक खास स्थान ऐ—प्हाड़ी लाके दा तीर्थ ऐ । आखदे न जे इत्थें शिव-पार्वती दा ब्याह होया हा । लोक धार्मिक आस्था लेइयै उत्थें जन्दे न । हाड़ा दी पुन्नेआं पर इत्थें म्हातम मन्नेआ जन्दा ऐ । उत्थें गेदे मित्तरी जरूर गै पानी पौंदी ऐ । रंग-वरंगे लोक औंदे न । शैहरियें गी दिक्खी प्हाड़ी लोक बड़े रूहान ते खुश हुन्दे न । मेला खरा भरोची जन्दा ऐ ।

बासक नाग :

भद्रवाह च बासक नाग दा मन्दर ऐ, इत्थें वी पुन्नेआं गी मेल लगदी ऐ । मेला शैल होई जन्दा ऐ । इस मेले च उस लाके दे लोक कुड्ड पांदे न । भाखां इस मेले गी सुआरदियां न ।

सौन म्हीन्ने दी संगरां दी गी राड़ें दा खीरी रुट्ट हुन्दा ऐ । इस दिन राड़ें पुट्टे जन्दे न । हर प्रां दे लागै खूह-बौली, तलाड जा नाले-नाइए दे

कण्ठे इक मेला-जन लग्गी जन्दा ऐ। ग्रां दियां कुड़ियां-जनानियां उस मेले च हिस्सा लैदियां न। नचदियां-गादियां ते कीकली पांदियां न। उस्सै दिन सकोलडें दा तयार बी हुन्दा ऐ।

नरसिंघे दा मेला :

जन्मअष्टमी कृष्ण भगवान दा जन्म दिन ऐ। कृष्ण जी दा गै अवतार नरसिंघ होए न, जिनें हरनाकण गी मारेआ हा। उन्दा इक मन्दर घगवाल (कठूआ) नां दे ग्रां च बने दा ऐ। इक बड़ा बड़्वा ते पक्का तलाऽ ऐ। मन्दर च इक कनका दा दाना रखे दा ऐ, जेह्ड़ा पता नेईं केड़ी सदी दा ऐ। खासा मुट्टा दाना ऐ। उत्थे इक बड़ा बड़्वा मेला लगदा ऐ—इसी नरसिंघे दा मेला आखदे न। बड़ी रौनक हुन्दी ऐ ते रौनक गी मता बघाई ओड़दे न गद्दी लोक। गदिये दी इस मेले च खास गिनतरी हुन्दी ऐ। उन्दा रंग-रूप ते सेह्तां दिक्खी-दिक्खी लोक र्हान-जन होई जन्दे न। इस्सै थाहर इक बारी पोह् महीनै बी मेला लगदा ऐ ते जदू बी रौनक शैल होई जन्दी ऐ।

नागपैचमी :

भादरों महीनै नागपैचमी औंदी ऐ। ए नागों दा दिन ऐ। इस दिन शिवजी महाराज ताड़ी लाई लैदे न। डोगरें च नागों दी बड़ी मानता ऐ। नागों च बावा सुरगल, बावा भैड़, बावा क्हाई, फकोड़ी, तहलन, बावा कैलक्ख देवते गिने गे न। नागपैचमी उप्पर इन्दी खास पूजा कीती जन्दी ऐ। जित्थे-जित्थे बी इन्दे थान होन, उत्थे जग-भण्डारा हुन्दा ऐ। इयां सेही हुन्दा ऐ जे मेला गै लग्गे दा ऐ। इस दिन नागवनी (जम्भू) च बी इक मेला लगदा ऐ।

बुड्ढा अमरनाथ :

रक्खड़-पुन्नेआं गी बुड्ढा अमरनाथ (गुन्ठ-रजौरी) च इक बड़ा भारी किट्ठ हुन्दा ऐ—इक मेला लगदा ऐ। आखदे न जे अमरनाथ (कश्मीर) कोला पैह्लें शिवजी इत्थे गै आए हे।

सौनी दी फसल अन्दर पुज्जने दा सनेहा लेइए औंदी ऐ कत्ते दी पुन्नेआं। इस पुन्नेआं दा म्हातम बी हाड़ा दी पुन्नेआं आला लेखा गै। इस दिन बी देवते-जठेरें, सतिये-शिलावैतिये दियां मेलां लगदियां न। इस दिन

गुरु नानकदेव जी दा गुरुपर्व बी हुन्दा ऐ। गुरुदुआरें दी रौनक दिक्खने आली हुन्दी ऐ।

झिड़ी :

कत्ते दी पुन्नेआं झिड़ी कन्ने जुड़ियै मती मशहूर होई जन्दी ऐ। बावा जित्तो दे शहीद होने आला थाहर झिड़ी खुआंदा ऐ। इत्थे बावा जित्तो ते बूआ कौड़ी दी समाध ऐ। इत्थे इक बड़ा बड़्वा मेला लगदा ऐ। बड़ी-बड़ी द्वारा लोक औंदे न। ए मेला चार-पंज दिन रौह्दा ऐ। मेले च मूण्ठे कन्ने कन्ने मूण्ठा खैहरदा ऐ, तिल मारे दा भुआं नेईं पौंश। रौह्ने आस्तै सरांईं बी हैन। अनगिनत देहरियां न। पुन्नेआं आलै दिन इक पासै लोक मेले दी रौनक च रज्जे दे हुन्दे न ते दूए पासै देहरिये पर बिचड़ियां पक्का दियां हुन्दियां न, मण्डले पवा दे हुन्दे न। डोल वज्ज दे हुन्दे न। जातरां होऐ दियां हुन्दियां न। डोलियां नच्चा दियां हुन्दियां न। इस मेले चा बी परतोने गी मन नेईं करदा।

इस मेले दी मशहूर चीज ऐ—गन्ने। गन्ने दे ठाले दे ठाले लग्गे दे हुन्दे न। आदमी इयै सोचदा ऐ जे सारे मुल्खे दे गन्ने इत्थे गै उठी आए न। चूपने च बड़े पुल्ले ते मिट्ठे। मेला दिक्खने परंत जन्दे होई, हर माहनू गन्ने दा भरोटू लेई गै जन्दा ऐ। ए इस लाके दी सगात ऐ।

पही सीतै गी पिछड़ी छण्ड करांदे औंदी ऐ चेतार चौदेआ। ए बी धार्मिक दिन ऐ। तीर्थ स्थान उप्पर शानान करने दा इस दिन म्हातम ऐ। होर थाहरें गी छोड़िए इस दिन चौं खास थाहरें उप्पर मेला लगदा ऐ। ए चारै थाहर देवक नदी दै कण्ठे न—उधमपुर, परमण्डल, उत्तर बैह्नी ते नमन्दर (हरि मन्दर)। चौनें थाहरें बड़ा गज्जी-बज्जिए मेला हुन्दा ऐ। बड़ी खलगत किट्ठी हुन्दी ऐ। इनें चौनें थाहरें चा परमण्डल दा खास मान-मुल्ल ऐ। इत्थे त्रै दिन मेला लग्गे दा रौह्दा ऐ। चौदेआ, मस्सेआ ते पैह्लै नरातै। बड़ी शैल रौनक हुन्दी ऐ। दौं प्हाड़िये दे बिच्चें बगदी देवका च गै मेला लगदा ऐ। उत्थे गै बजार लगदे न। पराना शिव मन्दर बी दिक्खने आला ऐ। लोक जल ते बिलपत्तरी कन्ने शिवे दी पूजा करदे न। भाखां मेले गी चार चन्न लाइ दिदियां न।

उत्तर बैह्नी बी दिक्खने आली जगह ऐ। इत्थे इक पराने शिव मन्दर दे अलावा होर बी केईं मन्दर न। महाराजा रणवीर सिंह दे जमाने

च इत्थे संस्कृत दी इक बड़ी बड्डी पाठशाला ते गोशाला हुन्दी ही । दूरा-दूरा दा विद्यार्थी संस्कृत पढ़न आँदे हे । हून छड़ियां अमारतां गी रे'ई गेदियां न ते ओबी भज्जे-त्रुट्टे दे थेह्-जन ल'बदे न । इत्थे इक खास गल्ल ए ऐ जे देवक इत्थे आइयै प्हाड़ा आली बक्खी बगदी ऐ ते फही अगमें जाइऐ दक्खना गी मुड़ी जन्दी ऐ । खबरै इस्सै करी इसदा नां उत्तर बैहूनी पेदा ऐ ।

खास मेलें दे लावा बी डुग्गर देसा च क्रिश थाहूर हैग, जित्थे किट्ट हुन्दे न ते ओ कुसै मेले कोला घट्ट नेईं ल'बदे । मते सारे पिडें च छि'ज कराने दा रवाज ऐ । दिन - बार पक्का कीता जन्दा ऐ । दूरा-दूरा दा पैह्लवान सद्दे जन्दे न । ढोल बजदे न । कुसै खुल्ले थाहूर बरेहाली च पिड़ लग्गी जन्दा ऐ । पैह्लवान फेरै निकलदे न । लोक उन्दियां सेह्तां दिक्खी-दिक्खी खुश होने न । घोल हुन्दे न ते कोई डांदा ऐ ते कोई दुआंदा ऐ । चार-चफेरै मेला-जन लग्गे दा सेही हुन्दा ऐ ।

डोगरे पीरें-फकीरें गी बी मनदे न उन्दियें खानगाएं पर जन्दे न । पीरें गी मन्नने आलें च छि'ज कराने दा बड़ा पक्का विश्वास ऐ । पीरें दियें खानगाएं पर होने आलियां छि'जां बल्ले दा बाग (अखनूर), चम्बलेआल (नन्दपुर) पीर बुड्ढन अली शाह (सतवारी) ते होर केईं थाहूर न ।

डुग्गर देस इक मेलें आला देस ऐ । ए सारे मेले आपसी मेल दी नशानी न । मेलें बिच ब'रें दे निकखड़े दे साक-सरबन्धी, दोस्त-यार मिली पौंदे न । मेले केइयें ब'रें दियां नराजगियां दूर करदे न । मेले दा मेला होई जन्दा ऐ ते सज्जनें ने मलाटी । केइयें बजुगें, देवी-देवतें, शहीदें, सतियें ते तीर्थ स्थानें दी याद नमीं होई जन्दी ऐ । मेले डुग्गर दी बरासत न, अमानत न । इन्दे ने देवी-देवतें, शहीदें, तीर्थ स्थानें, ते म्हापुरखें दी याद बज्जी दी ऐ । डुग्गर दी लोक संस्कृति दे बड़े रंग बरकरार न । हर माहूनू दा धर्म बनदा ऐ जे रीति-रवाज दे मतावक मेलें गी मनाऽ । मेले हरिकैम रौहून ते मनाने आलियां जातियां पीढी-दर-पीढी चलदियां रौहून ।

००००